

Եւ գիտել պարտ է, զի թագուհին ընկեր է թագաւորին եւ մի մարմին եւ թագակից. վասն այնորիկ պարտ է աստիճանաւոր տիկնացն սպասաւորել նմա, եւ առնուլ 'ի նմանէ շնորհս, որպէս իւրեանց արքն 'ի թագաւորէն. զի եւ նոքա մի մարմին են ըստ աստիճանաւորացն՝ Աստուծոյ օրինօք: Իսկ վաղիւն գան յարքունիսն իշխանքն եւ տիկնայքն եւ սպասաւորքն, իւրաքանչիւր գործովն՝ ուրախութեամբ, աւուրս՝ որչափ եւ կամին. բայց գրեմք որ պատշաճն՝ ութ օր է» footnote-ում:

Կարգ Թագաւոր-օրհնէից՝ ութօրեայ մի պատշաճ համարին չափու ուրախութեանց, 'ի յաջորդել թագաւորի. այլ անսահման իմն գրելի էր զչափ խնդութեան եւ հանդիսից 'ի թագաւորութեանն Լեւոնի, որ ողջոյն իսկ թագաւորութեան ազգին վերականգնումն էր, որպէս գեղեցիկ խորհրդածէ պատմիչն մեր, յետ նշանակելոց զօծումն նորա. «Եւ եղև *ուրախութիւն մեծ՝ ազգիս Հայոց*. զի տեսին վերստին կանգնեալ եւ նորոգեալ զտէրութիւն իւրեանց յերեսս Լեւոնի՝ բարեբարոյ եւ աստուածասէր արքայի»: Հնչեցին եւ 'ի հեռուստ հայկական ծագաց վկայութիւնք հրճուանաց. ժամանակագիրն Սամուէլ Անեցի կամ անընդմէջ շարայարող նորին համառօտ բանից, ոչ կարէ աստանօր 'ի կարգի տարեգրութեանն՝ բայց մեծապէս տալ փառս Աստուծոյ. «Օրհնութիւն, զովութիւն եւ մեծ փառաբանութիւն, բերանալիւր գոհութեամբ, ամենողորմ Տեառն... զի գթացաւ 'ի մեզ... կանգնելով վերստին զանկեալքս եւ զկործանեալքս. յարուցանելով մեզ թագաւոր յազգէ մերմէ, զԼեւոն՝ որդի Ստեփանէի, այր *բարեպաշտ եւ քրիստոսասէր*, եւ քաջարի 'ի պատերազմի. որ նորոգեալ պայծառացոյց զեկեղեցի. վասն որոյ տօնեսցուք մինչև յանկիւնս սեղանոյ, փառաւորելով զԱստուած»:— Ըստ սմին օրինակի եւ այլք 'ի պատմչաց թագաւորութեանն՝ զգովութիւնս Լեւոնի կցորդեն ընդ մեծի ուրախութեան ազգին. որպէս Կիլիկեցի կամ արքունի պատմիչն, Կիրակոս, եւ նորին ընկեր Վարդան: Մա ընդ յիշելն զօծումն թագաւորութեանն՝ յարէ. «Եւ էր *ճոխ* եւ *յաղթագեաց* եւ *հարկադիր* եւ *լծատանջ* ամենայն շրջակայ ազգացն»: Ճոխութիւն Լեւոնի՝ ոգովն առաւել քան գանձուք, տօնն անգուգական, եւ պատմեալքն վասն յաջորդաց իւրոց, առանց ինչ երկբայութեան տան գուշակել քանի՛ առատապարգև գտաւ յաւուր յայնմիկ, ո'րքան բարձրացոյց եւ հարստացոյց զպարոնայսն եւ զլիճ ճորտս իւր. ո'րքան տուրս վանորէից, եկեղեցեաց եւ եկեղեցականաց, որքանեա՛ց ազատութիւն շնորհեաց. եւ ո'րքան ընծայս մեծագինս առ հիւրսն հրաւիրեալս եւ ինքնեկս, մեծ եւ